



### **Dret da fabrica staziun passiva da relais in Val Schivò**

Il dret da fabrica tanter il Cumün da Zernez, la Corporaziun da vaschins Zernez e'l Chantun Grischun a regard la staziun passiva da relais in Val Schivò scada dal 2019 ed ha da gnir prolungà per ulteriurs 30 ons. La Corporaziun da vaschins sco eir la suprastanza han acconsenti a la prolungaziun.

### **Colliaziun bloc da büschens e cabels da la staziun da transfuormaziun in Cul fin la nouva „vasca camping“ – planisaziun**

Da prümavaira 2018 as voul proseguir culla colliaziun da forz'electricica tanter la suotstaziun a Zernez e la staziun da transfuormaziun in Cul per cha tanter oter eir la MiaEngiadina possa trar aint il cabel da fibr'optica tanter Scuol e Zuoz. Uossa faja dabsögn amo d'üna colliaziun tanter la nouva „vasca camping“ e la staziun da transfuormaziun in Cul. Per cuntinuar cul proget es güda surdatta l'incumbenza da planisaziun al büro Caprez Ingenieure AG a Zernez ed al büro Brüniger AG da Cuaira.

### **Pumpiers Zernez – contrat culla GVG GR a regard salvamaint sün vias**

La sgüranza d'edifizis dal Grischun (GVG) ha elavurà ün nouv contrat, chi regla ils detagls sco l'organisaziun, drets e dovairs dal salvamaint sün vias in nossa regiun. Il contrat correspondent es gnü sancziunà.

### **Scoula Zernez – proposta clav da scumpart logopedia 2018/19**

Il numer d'uffants, chi douvran sustegn da la logopedia in scoula, dals ultims duos ons nu correspuondan plü a la clav da scumpart existenta sco cha'ls cuosts dessan gnir spartits tanter ils trais cumüns da Scuol, Valsot e Zernez. La cunvegna da collavuraziun tanter ils trais cumüns ha da gnir stipulada da nouv. La suprastanza ha trattà ed approvà la proposta da la clav da scumpart.

### **Consultaziun da la ledscha da cumüns e baselgias (GKStG)**

La suprastanza ha tractandà la consultaziun da la ledscha d'impostas per cumüns e baselgias. I's tratta dad üna revisiun parziala chi pertocca l'imposta sün relasch e donaziuns. La suprastanza va d'accord culla proposta e nu piglia posiziun in chosa.

### **Organigram da las Gestions Tecnicas**

In connex cun la nouva structura d'organisaziun pro las Gestions Tecnicas es gnü adattà l'organigram da quella secziun süls 1. schner 2018.

### **Sanaziun dal suotpassagi da la Viafier Retica in Champatsch – surdatta d'incumbenzas**

Sco fingià cuntschaint vain d'ürant l'on 2018 sanà il suotpassagi da la Viafier Retica in Champatsch a Zernez. La Viafier Retica ed il Cumün da Zernez mainan insembel la submissiun e la planisaziun da la sanaziun dal suotpassagi. La suprastanza ha decis tenor la proposta da la Viafier Retica da surdar las lavurs a las seguaintas dittas: indschegner da fabrica a Fanzun AG a Samedan; direcziun da fabrica a Canclini + Peer Scrl a Scuol; impressari da fabrica a Foffa Conrad SA a Zernez.